

Na osnovu člana IV 4. a) Ustava Bosne i Hercegovine, Parlamentarna skupština Bosne i Hercegovine, na 55. sjednici Predstavničkog doma, održanoj 24. i 28. oktobra 2013. godine, i na 34. sjednici Doma naroda, održanoj 16. decembra 2013. godine, usvojila je

**ZAKON
O IZMJENAMA ZAKONA O POSTUPKU
INDIREKTOG OPOREZIVANJA**

Član 1.

U Zakonu o postupku indirektnog oporezivanja („Službeni glasnik BiH“, broj 89/05), u članu 10. stav (1) postotak „0,06%“ zamjenjuje se postotkom „0,04%“.

Član 2.

U članu 11. stav (1) postotak „10%“ zamjenjuje se postotkom „5%“.

Član 3.

Član 52. mijenja se i glasi:

„Član 52.

(Povjerljivost podataka o indirektnim porezima)

- (1) Podaci, zapisi ili izvještaji koje UIO dobije kao rezultat izvršavanja obaveza po osnovu indirektnih poreza, posebno su povjerljivi i mogu se koristiti samo za potrebe indirektnih poreza ili za izvršenje sankcija indirektnih poreza. Podaci se ne mogu ustupiti ili objaviti bilo kojoj drugoj strani, osim u sljedećim slučajevima suradnje sa:
- a) pravosudnim organima ili sa javnim tužiocem u istragama ili krivičnom gonjenju po službenoj dužnosti,
 - b) pravosudnim organima ili sa javnim organima u zaštiti maloljetnih lica ili drugih lica bez ovlaštenja za postupanje,
 - c) sudijama u izvršenju rješenja. Kod zahtjeva za dostavljanje podataka od sudije potrebna su odgovarajuća objašnjenja u vezi sa nemogućnosti dobivanja podataka iz bilo kojih drugih izvora,
 - d) drugim poreznim upravama za potrebe poštovanja poreza u okvirima njihove nadležnosti,
 - e) fondovima koji upravljaju socijalnim doprinosima i drugim javnim administracijama za borbu protiv prijevара u sistemima penzione ili javne (socijalne) pomoći ili fiskalnih prijevара,
 - f) državnim organima koji su nadležni za naplatu drugih javnih prihoda za potrebe identifikacije poreznih obveznika,
 - g) Vijećem ministara Bosne i Hercegovine, Vladom Republike Srpske, Vladom Federacije Bosne i Hercegovine, kao i suradnje sa Vladom Brčko Distrikta, za potrebe vršenja poslova iz njihovog djelokruga rada,
 - h) organima nadležnim za provođenje radnji na otkrivanju i sprječavanju krivičnih djela, ako do istih ne mogu doći na drugi način,

i) Agencijom za statistiku Bosne i Hercegovine i entitetskim zavodima za statistiku za dostavljanje podataka koji su potrebni za obavljanje poslova iz njihove nadležnosti, i

j) Centralnom bankom Bosne i Hercegovine u obimu koji je potreban za obavljanje poslova iz njihove nadležnosti.

(2) Izuzetno od stava (1) ovog člana ne smatra se posebno povjerljivim podatak o dospjelom a neplaćenom dugu obveznika indirektnih poreza ako se dostavlja sredstvima javnog informiranja ili objavljuje na internet stranici, izostavljajući identifikacioni broj za pravno lice i jedinstveni matični broj za fizičko lice.

(3) Objavljivanje ili dostavljanje podataka vršit će se elektronskim putem kada je to tehnički i praktično moguće.

(4) UIO i korisnici podataka iz stava (1) ovog člana preduzimaju potrebne mjere za garanciju povjerljivosti i odgovarajuću upotrebu podataka obveznika indirektnih poreza. Lice koje od UIO dobije podatke shodno stavu (1) ovog člana, odnosno koje ima pristup ovim podacima dužno je da zaštiti i poštuje njihovu povjerljivost. Otkrivanje ovakvih podataka smatra se teškom povredom službene dužnosti i rješavat će se primjenom odgovarajućih zakonskih propisa.

(5) Bilo koji službenik UIO koji zna ili ima pristup ovim podacima dužan je da zaštiti i poštuje njihovu povjerljivost, osim u slučajevima navedenim u st. (1) i (2) ovog člana. Otkrivanje ovakvih podataka smatra se teškom povredom službene dužnosti i rješavat će se primjenom odgovarajućih zakonskih propisa.

(6) Oni koji primaju uplate i oni koji su obavezni da vrše plaćanje na račun također su dužni da štite i poštuju povjerljivost poreznih podataka“.

Član 4.

Ovaj Zakon stupa na snagu osmog dana od dana objavljivanja u „Službenom glasniku BiH“.

PS BiH broj 01,02-02-1-41/13
Sarajevo, 16. decembra 2013.godine

Predsjedavajući
Predstavničkog doma
Parlamentarne skupštine BiH
Dr. Denis Bećirević, s.r.

Predsjedavajući
Doma naroda
Parlamentarne skupštine BiH
Staša Košarac, s.r.